



Senin, 25 September 2023

Ogen: Amos 6:8-14



KEBUJUREN JADI RACUN



Nabi Amos nuriken kerna kegeluhen bangsa Israel alu tangkas, la lit si erbuni-buni. Ikataken Dibata, segat kal atena bangsa e sabap meganjang ukurna. Rumahna ciga ate Dibata. Emaka ipediat Dibata ceda, iendeskenna man musuh-musuhna. Si enda kerina erkiteken kejahatan bangsa e, i ja enggo isalihkenna kebujuren jadi racun, ijadikenna si benar jadi salah. Bage kepeken pergeluh bangsa e, e maka lanai lit si erbahanca meriah ukur Dibata. E maka ukumen me si jadi bagin bangsa e, ipediat Dibata ikuasai bangsa sideban ia kerina. Itindih bangsa sideban me ia. Kecibal kegeluhen bangsa enda tahu-tuhu jahat, arah kecibal ras dampar si apai pe lanai lit erbahanca ngena ate Dibata.

Kejahaten e me sada perbahanen si ndauh i bas sura-sura Dibata, erlawanen ras kerina kebenaran, erbahan ceda, sakit ukur kalak. Si benar si salahkenna, si pinter ibengkukkenna ras sebaliknya. Kai pe banci iaturna subuk alu kuasa, duit ras pertemanenna. Perbahanen si bagenda desken racun, erbahan kalak sakit, munuh kalak sideban. Perlu kal kita metenget ngenehen kecibal sibagenda rupana. Perlu kal nilahi ras la erteman ras perukuren si bagenda gelah la langket man banta. Tapi enda me si jadi perbeben bangsa e, la sada-sadai si ngelakoken si bage rupana tapi enggo kejahatan ras, erlumba jadi jahat.

Kai si banci silakoken, ula kal si mehuli si jadikan racun. Adi banci racun e pe si bahan tawarna gelah lanai ncedai ntah pe munuh. Arus jadi kalak megegeh kita gelah la icedai si jahat tapi banci geluhta, pengerana ras perukuren rikut perbahanenta jadi tawar bisa, jadi tambar pinakit. Mpepalem pusuh si ceda, ngkuhi keriahen ukur kalak sideban. Meriah ukur Dibata natapsa alu bage labo ukumen si pesusurna.